



ՀԱՅԱՍՏԱՆԻ ԶԱՆԳՎԱԾԱՅԻՆ ԼՐԱՏՎՈՒԹՅԱՆ ՄԻՋՈՇԱԿՆԵՐԻ ԷԹԻԿԱՅԻ ԴԻՏՈՐԳ ՄԱՐՄԻՆ

Հայաստանի Հանրապետություն, 0002 Երևան, Ղազար Փարպեցի, 9բ
հեռ.՝ + 374 10 53 00 67, էլ. փոստ՝ meo@ypc.am

Դիտորդ մարմնի կազմը

Դավիթ ԱԼԱՎԵՐԴՅԱՆ

Նարինե ԱՎԵՏԻՍՅԱՆ

Սուրեն ԴԵՆԵՐՅԱՆ

Արսեն ԽԱՌԱՏՅԱՆ

Արա ՂԱԶԱՐՅԱՆ

Աշոտ ՄԵԼԻՔՅԱՆ

Մարգարիտա ՄԻՆԱՍՅԱՆ

Գնել ՆԱԼԲԱՆԴՅԱՆ

Բորիս ՆԱՎԱՍՍԱՐԴՅԱՆ

Արա ՇԻՐԻՆՅԱՆ

Արեվիկ ՍԱՀԱԿՅԱՆ

Նունե ՍԱՐԳՍՅԱՆ

Վիգեն ՍԱՐԳՍՅԱՆ

Անժելա ՍՏԵՓԱՆՅԱՆ

ՀԱՅԱՍՏԱՆԻ ԶԼՄ-ՆԵՐԻ ԷԹԻԿԱՅԻ ԴԻՏՈՐԳ ՄԱՐՄԻՆԻ ՓՈՐՁԱԳԻՏԱԿԱՆ ԿԱՐԾԻՔԸ

«Ժողովուրդ» օրաթերթի գլխավոր խմբագիր Քնարիկ Մանուկյանին եւ ArmLur.am լրատվական կայքի խմբագիր-պատասխանատու Սոնա Գրիգորյանին ԱԺ հավատարմագրումից զրկելու մասին

Ա. ՓԱՍՏԵՐ

1. 2025թ. դեկտեմբերի 24-ին Հայաստանի ԶԼՄ-ների էթիկայի Դիտորդ մարմին (ԴՄ) են դիմել «Ժողովուրդ» օրաթերթի գլխավոր խմբագիր Քնարիկ Մանուկյանը եւ ArmLur.am-ի խմբագիր-պատասխանատու Սոնա Գրիգորյանը՝ պնդելով, որ իրենց ԱԺ հավատարմագրումից 1 տարով զրկել են այն պատճառով, որ իրենք իշխող ուժի պատգամավորին ԱԺ-ում ուղղել են նրա համար անցանկալի հարց:
2. Ըստ դիմումատուների՝ հավատարմագրումից զրկելու գործընթացն իրականացվել է ԱԺ նախագահի վերահսկողությամբ:
3. Ըստ դիմումատուների՝ իրենց հավատարմագրումից զրկելը Մարդու իրավունքների եվրոպական կոնվենցիայի (ՄԻԵԿ) 10-րդ հոդվածի, ՀՀ Քաղաքացիական եւ քաղաքական իրավունքների մասին կոնվենցիայի (ՔՔԻԴ) 19-րդ հոդվածի, Եվրոպայի անվտանգության եւ համագործակցության կազմակերպության (ԵԱՀԿ) մեդիայի ազատության հանձնակատարի արտահայտած սկզբունքների կոպիտ խախտում է:
4. 2024թ. դեկտեմբերի 17-ին լրագրող Սոնա Գրիգորյանին տրվել է նախազգուշացում, 2 օր անց նա զրկվել է հավատարմագրումից, որի պատճառով 1 տարի չի կարող ԱԺ շենք մտնել որպես լրագրող: Լրագրող Քնարիկ Մանուկյանին դեկտեմբերի 18-ին տրվել է նախազգուշացում, հաջորդ օրը 1 տարով զրկվել է հավատարմագրումից՝ նույն արարքի համար (ըստ ԱԺ փաստաթղթային հիմնավորման՝ լրագրողները խախտել են ՀՀ ԱԺ նստավայրի տարածքում եւ շենքում գործող անվտանգության կանոնների 1.6. դրույթը. պահպանվող օբյեկտի հատուկ վերահսկելի գոտիներում արգելվում է Ազգային

ժողովում հավատարմագրված լրատվական միջոցներին զբաղվել մասնագիտական գործունեությամբ):

5. Լրագրող Քնարիկ Մանուկյանին 2-րդ անգամ են զրկում ԱԺ հավատարմագրումից. նույն սցենարը գործել է 2023թ. դեկտեմբերի 15-ին, ինչի առիթով լրագրողական կազմակերպությունները հանդես են եկել [հայտարարությամբ](#), ավելի ուշ Առաջին ատյանի դատարանը ոչ իրավաչափ է ճանաչել ԱԺ աշխատակազմի այդ որոշումը:

Բ. ԻՐԱՎԱԿԱՆ ԵՎ ԷԹԻԿԱԿԱՆ ՆՈՐՄԵՐ

ԶԼՄ-ների էթիկայի դիտորդ մարմնի աշխատակարգը սահմանում է, որ

5.4. ԴՄ-ն քննության է առնում տեղեկատվության ոլորտում պաշտոնապես գործունեություն իրականացնողների մասնակցությամբ տեղեկատվական վեճերը եւ ըստ անհրաժեշտության հանդես է գալիս հայտարարությամբ կամ հրապարակում է փորձագիտական կարծիք:

Գ. ՓՈՐՁԱԳԻՏԱԿԱՆ ԿԱՐԾԻՔ

Հայաստանի ԶԼՄ-ների էթիկայի Դիտորդ մարմինը, ուսումնասիրելով «Ժողովուրդ» օրաթերթի գլխավոր խմբագրի եւ Armlur.am կայքի խմբագիր-պատասխանատուի դիմումը, Ազգային ժողովի աշխատակազմի ընդունած վարչական ակտերը, ԱԺ-ում լրագրողների հավատարմագրման կարգին վերաբերող փաստաթուղթը, ԱԺ աշխատակազմի ղեկավար - գլխավոր քարտուղարի 2025թ. դեկտեմբերի 19-ի 1/5278 գրությունը եւ խոսքի ազատությանը վերաբերող միջազգային փաստաթղթերը, արձանագրում է հետևյալը.

- Խոսքի եւ տեղեկատվության ազատությունը երաշխավորված է ՀՀ Սահմանադրությամբ, «Զանգվածային լրատվության մասին» օրենքով, ՄԻԵԿ 10-րդ հոդվածով, ՔՔԻԴ 19-րդ հոդվածով, ԵԱՀԿ մեդիայի ազատությանը վերաբերող փաստաթղթերում ձեռնարկված սկզբունքներով:
- Այս նորմերի համակցված մեկնաբանությունը պարտադրում է, որ լրագրողների գործունեության որեւէ սահմանափակում ա) լինի օրինական, բ) ծառայի լեգիտիմ նպատակի, գ) լինի անհրաժեշտ եւ համաչափ՝ ժողովրդավարական հասարակությունում, դ) չկրի զսպիչ (chilling effect) բնույթ:

Դիտորդ մարմինն արձանագրում է, որ

- Ազգային ժողովում լրագրողների հավատարմագրման կարգում կիրառվող ընդհանուր եւ չկոնկրետացված ձեռնարկումները («խոչընդոտում», «խախտում», «անթույլատրելի վարքագիծ») չեն ապահովում լրագրողի համար կանխատեսելիություն, թույլ չեն տալիս ողջամտորեն հասկանալ, թե հատկապես ո՞ր

գործողությունը կարող է դիտարկվել որպես խախտում: Նման կարգավորումները հակասում են իրավական որոշակիության սկզբունքին եւ չեն համապատասխանում ՄԻԵԴ նախադեպային իրավունքում ձեւավորված պահանջներին, ըստ որոնց՝ խոսքի ազատության սահմանափակումները պետք է լինեն կանխատեսելի եւ կամայականությունից պաշտպանված: Այս հանգամանքը հակասում է Մարդու իրավունքների եվրոպական կոնվենցիայի 10-րդ հոդվածի իմաստով «օրենքով սահմանված» լինելու պահանջին, ինչպես այն մեկնաբանվել է Մարդու իրավունքների եվրոպական դատարանի նախադեպային իրավունքում (*Sunday Times v. the United Kingdom*, Şener v. Turkey):

- Լրագրողների նկատմամբ կիրառված առավել խիստ պատժամիջոցի՝ մեկ տարի ժամկետով հավատարմագրումից զրկելու մասին ԱԺ աշխատակազմի դեկավարի՝ 2025թ. դեկտեմբերին ուղարկված 1/5278-2025 գրության մեջ չի հիմնավորվել լրագրողների վարքագծի իրական վտանգավորությունը, չի կատարվել Ազգային ժողովի բնականոն գործունեությանը պատճառված վնասի կամ անվտանգության ռիսկի գնահատում: Փաստաթղթում չեն ներկայացվել չափելի եւ օբյեկտիվ չափանիշներ, որոնց հիման վրա հնարավոր կլիներ եզրակացնել, որ տվյալ միջամտությունը եղել է անհրաժեշտ եւ համաչափ՝ ժողովրդավարական հասարակությունում: Մա հակասում է ՄԻԵԴ-ի ձեւավորված դիրքորոշմանը լրագրողների դեմ պատժամիջոցների կիրառման վերաբերյալ (*Cumpăna and Mazăre v. Romania*, *Stoll v. Switzerland*):
- Դիտորդ մարմինը մտահոգիչ է համարում այն փաստը, որ հավատարմագրման կարգի կիրառումը տվյալ դեպքում ԱԺ աշխատակազմին հնարավորություն է տվել, առանց հստակ սահմանված ընթացակարգերի եւ վերահսկողական երաշխիքների, նախ կիրառել նախազգուշացում, իսկ անմիջապես հաջորդ օրը՝ առավել խիստ պատժամիջոց՝ հավատարմագրումից զրկում: Նման լայն հայեցողությունը, որն օգտագործվել է լրագրողներ Սոնա Գրիգորյանի եւ Քնարիկ Մանուկյանի նկատմամբ, չի համատեղվում Մարդու իրավունքների եվրոպական դատարանի նախադեպային իրավունքի այն պահանջների հետ, ըստ որոնց խոսքի ազատության ոլորտում պետական մարմինների հայեցողությունը պետք է լինի սահմանափակ եւ կամայականությունից պաշտպանված:
- Դիտորդ մարմինը կարելուորում է նաեւ այն հանգամանքը, որ պատժամիջոցների կիրառումը հաջորդել է լրագրողների կողմից Ազգային ժողովում պատգամավորներին ուղղված քաղաքականապես սուր եւ քննադատական հարցադրումներին, որոնք բխում են լրագրողների կողմից հանրային վերահսկողության իրենց օրինական գործառույթի իրականացումից: Այս համատեքստում հավատարմագրումից զրկելը չի կարող դիտարկվել որպես բովանդակային չեզոք միջոց եւ կրում է զսպիչ բնույթ, ինչը հակասում է ՄԻԵԿ-ի 10-րդ հոդվածի պաշտպանական նպատակին: Դիտորդ մարմինը սա

գնահատում է ոչ համաչափ վարչական միջամտություն
լրագրողների մասնագիտական գործունեությանը:

- Հատկապես կարելու է, որ լրագրող Քնարիկ Մանուկյանի նկատմամբ նույն սցենարով հավատարմագրումից զրկում արդեն կիրառվել է 2023 թվականին, եւ դատարանը ոչ իրավաչափ է ճանաչել այդ որոշումը: Նման պայմաններում նույն մեխանիզմը կրկին կիրառելը չի կարող դիտարկվել որպես պատահական կամ տեխնիկական սխալ եւ վկայում է համակարգային, կանխամտածված վարքագծի մասին:

Դիտորդ մարմինն արձանագրում է, որ ԱԺ ղեկավարության կողմից հավատարմագրման կարգի նման կիրառումը՝

- կարող է ստեղծել անտեղի զգուշավորության եւ ինքնագրաքննության մթնոլորտ լրագրողների շրջանում,
- ազդակ է, որ սուր հարցադրումները կարող են հանգեցնել մասնագիտական գործունեության սահմանափակման,
- խաթարում է Ազգային ժողովի՝ հանրային վերահսկողության ենթակա ինստիտուտի թափանցիկությունը:

Սա ունի ոչ միայն անհատական, այլեւ լայն հանրային վտանգ, քանի որ սահմանափակում է հասարակության՝ տեղեկացված լինելու իրավունքը:

Տեղեկավական վեճերի խորհուրդը, հաշվի առնելով այս եւ նմանատիպ փաստերը՝ սեփական նախաձեռնությամբ ուսումնասիրել է [Ազգային ժողովում լրագրողների հավատարմագրման կարգը](#) եւ դրա խնդրահարույց դրույթների վերաբերյալ հրապարակել է [կարծիք](#), որում, մասնավորապես, նշում է. «Կարգում սահմանված կարելուր սկզբունքներից մեկն այն է, որ հավատարմագրումը ոչ թե հանրային մարմնի պահանջ է, այլ՝ լրատվամիջոցի իրավունք: Դա նշանակում է, որ այդ մարմիններին վերապահված է միայն դիմումի գրանցման իրավասություն, ինչը չի կարող մեկնաբանվել ու կիրառվել որպես թույլտվություն: Այս մոտեցումը բխում է «Զանգվածային լրատվության մասին» օրենքի 6-րդ հոդվածից, որն էլ ներկրվել է միջազգային իրավունքից: Հետեւաբար, կանխավարկածը գործում է հավատարմագրման օգտին, այսինքն՝ հավատարմագրման դիմումի մերժում կամ հավատարմագրման դադարեցում կարող է կատարվել միայն որոշակի խիստ անհրաժեշտության դեպքում՝ պայմանավորված հանրային շահով»:

Հայաստանի ԶԼՄ-ների էթիկայի Դիտորդ մարմինը հիշեցնում է, որ լրագրողական կազմակերպությունները սույն թվականի հունվարի 16-ին [Հայտարարություն](#) են տարածել լրագրողներ Քնարիկ Մանուկյանի եւ Սոնա Գրիգորյանի մասնագիտական գործունեությունը խոչընդոտելու վերաբերյալ եւ ընդգծել են, որ ԱԺ-ում լրագրողների հավատարմագրման գործընթացները հակասում են ՀՀ սահմանադրությամբ, «Զանգվածային լրատվության մասին» օրենքով, Հայաստանի ստորագրած միջազգային փաստաթղթերով ամրագրված՝ խոսքի ազատության եւ ԶԼՄ-ների գործունեության երաշխիքներին:

Դիտորդ մարմինը կրկին արձանագրում է, որ Ազգային ժողովում պատգամավորների եւ լրագրողների միջեւ ձեւավորվել է անառողջ, լարված եւ կոնֆլիկտային մթնոլորտ: Այս միջավայրում հավատարմագրման կարգը գործնականում կիրառվում է ոչ թե որպես կազմակերպական գործիք, այլ որպես որոշ լրատվամիջոցների գործունեությունը սահմանափակելու լծակ:

Դիտորդ մարմինն անհրաժեշտ է համարում՝

- Քնարիկ Մանուկյանին եւ Սոնա Գրիգորյանին ԱԺ հավատարմագրումից զրկելու որոշումների չեղարկումը,
- լրագրողների հավատարմագրման կարգի վերանայումը եւ համապատասխանեցումը խոսքի ազատության միջազգային չափանիշներին,
- ԱԺ-ում լրագրողների ու պատգամավորների միջեւ մասնագիտական շփումների առողջ միջավայր ձեւավորելու ուղղությամբ իրական միջոցների ձեռնարկումը:

**Ընդունվել է 2026թ. մարտի 23-ին,
ԶԼՄ-ների էթիկայի Դիտորդ մարմնի հետեւյալ կազմով**

Գնել ՆԱԼԲԱՆԴՅԱՆ
«Նյումեգ» հրատարակչության գլխավոր խմբագիր
Բորիս ՆԱՎԱՍԱՆԴՅԱՆ
Երեւանի մամուլի ակումբի պատվավոր նախագահ
Դավիթ ԱԼԱՎԵՐԴՅԱՆ
«Մեդիամաքս» լրատվական գործակալության գլխավոր խմբագիր
Վիգեն ՍԱՐԳՍՅԱՆ
ԵՄԱ մասնագիտական էթիկայի հանձնաժողովի նախագահ
Արա ՂԱԶԱՐՅԱՆ
Իրավաբան
Նունե ՍԱՐԳՍՅԱՆ
Մեդիա նախաձեռնությունների կենտրոնի գործադիր տնօրեն
Մուրեն ԴԵՉԵՐՅԱՆ
Ampop.am-ի հիմնադիր խմբագիր
Աշոտ ՄԵԼԻՔՅԱՆ
Խոսքի ազատության պաշտպանության կոմիտեի նախագահ
Մարգարիտա ՄԻՆԱՍՅԱՆ
«Ցայգ» հեռուստաընկերության տնօրեն
Արսեն ԽԱՌԱՏՅԱՆ
«Ալիք Մեդիա» լրատվական-վերլուծական կայքի հիմնադիր
Արեւիկ ՍԱՀԱԿՅԱՆ
Factor TV-ի գործադիր տնօրեն
Նարինե ԱՎԵՏԻՍՅԱՆ
Վանաձորի «Լոռի» ՀՀ գործադիր տնօրեն
Անժելա ՍՏԵՓԱՆՅԱՆ
Արմավիրի «ԱԼՏ» հեռուստաընկերության խմբագիր

[ԶԼՄ-ների էթիկայի Դիտորդ մարմինը](#) ձեւավորել են Ինքնակարգավորման նախաձեռնությանը միացած լրատվամիջոցները, որոնք այս պահին 98-ն են:

ԴՄ-ն ղեկավարվում է Հայաստանի լրատվամիջոցների և լրագրողների էթիկական սկզբունքների Կանոնագրով, որն ընդունվել է 2007 թվականի մարտի 10-ին, վերախմբագրվել՝ ինքնակարգավորման նախաձեռնության համաժողովում, 2024 թվականի մայիսի 18-ին: